



Sed jam Memnoniis Titan properabat ad undis
 Efferre ardentem currum, igniferosque jugales.
 Ergo imam tenues terram, & sua corpora vitæ
 Jam repetunt, summo se reddunt ardua olympos
 Numina, dispersi varias Heroes in oras
 Quisque suam redeunt ad sedem: me mea Diva,
 Quæ vidi, immensum jubet evulgare per orbem,
 Ac fugiens celeri se tollit in æthera cursu.
 Ipse libens Divæ jussa exequor: en sonat omne
 Arcadicum nemus, & vocem septena remittunt
 Culmina: se domina late diffundet ab Urbe
 Fama loquax, magni confinia ad ultima Mundi
 Visa arcana ferens ultra & Garamantas, & Indos.

- (1) *Petrus Corarius, qui avitæ nobilitatis decus propriis ipse dotibus, atque virtutibus cumulavit in immensum, jam ultra decennium in legationibus nobilissimis versatus est per Europam. Is adhuc erat Viennæ superiore anno in ipsa illa prima ejus urbis trepidatione post irruptionem a Borusso factam in Bohemiam, & Pragensem cladem, qua in urbe, ut & alibi ubique, magnificentissime vixit, & apud Imperatorem, ac Imperatricem Reginam difficilima quæque patriæ negotia summa cum dexteritate, & vero etiam felicitate, atque omnium adprobatione tractavit.*
- (2) *Electionem recentem Clementis XIII. P. M. e Venetâ itidem Senatoria Rezzonicorum familia, publicam totius urbis letitiam, & plausum, nemo non novit; ac festa magnificentissima ab ipso Veneto Legato Corario publice exhibita sunt sane notissima & hic Romæ, & per Europam universam, per quam ea diariis impressa publicis evulgata sunt.*
- (3) *Est mihi egregium omnino telescopium, Jovi in primis*